



N°671
Entrée le 29.04.2024
Chambre des Députés
Déclarée recevable
Président de la Chambre des Députés
(s.) Claude Wiseler
Luxembourg, le 30.04.2024

Claude WISELER
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 29/04/2024

Här President,

Sou wéi den Artikel 80 vun eisem Chambersreglement et virgesäit, biede mir lech, dës parlamentaresch Fro un d'Ministere fir den Interieur, Aarbecht, Ëffentlechen Déngscht & Wunnengsbau weiderzeleeden.

Déi nei Regierung huet sech op de Fändel geschriwwen, fir d'Prozeduren am Bau ze vereinfachen an d'Bauen esou ze beschleunegen. An deem Kader freet een sech dann, wou een dës ka beschleunegen. Dëst fir d'éischt beim Staat selwer, wou vill verschidden Acteure mussen zesumme schaffen, dëst zum Beispill am Kader vum Bau vu Centres culturels, Schoulen an anere Gebaier.

An deem Zesammenhang wéilte mir de Ministeren dës Froe stellen:

1. Wéi schafft den SNSFP, d'ITM an zum Beispill den CGDIS bei staatleche Projeten zesummen? Bei wéi engen Etappen ass dëst de Fall?
2. Wéi eng Ressourcen a Prozedure kéint een hei zesummeleeë fir d'Prozedur insgesamt ze beschleunegen?
3. Falls d'Regierung heizou nach keng Ausso ka maachen, wäert si dës Analys dës Legislaturperiod maachen? Falls jo, bis wéini? Falls nee, firwat net?

Mat déiwem Respekt,

CLEMENT Sven
Deputéierten

GOERGEN Marc
Deputéierten

POLIDORI Ben
Deputéierten



www.piraten.lu



Äntwert vum Här Inneminister, Léon Gloden, vum Aarbechtsminister, Georges Mischo, vum Minister fir Wunnengsbau a Landesplanung, Claude Meisch, a vum Minister fir d'Fonction publique, Serge Wilmes, op d'parlamentaresch Fro n° 671 vun den honorabelen Deputéierte Marc Goergen, Sven Clement a Ben Polidori zum Sujet « Accélération des procédures liées à la construction »

Fro 1

Et gëtt eng permanent Zesummenaarbecht tëschent dem CGDIS, der Inspection du travail et des mines (ITM) an dem Service national de la sécurité dans la fonction publique (SNSFP). De CGDIS proposéiert dem Demandeur vun enger Baugenehmegung, gemeinsam Reunioune mat de betreffenen Acteuren ze organiséieren, dëst mam Zil, sech fréizäiteg ofzestëmmen an dem Bauhär domat Planungssécherheet ze ginn.

D'ITM an de CGDIS baséieren sech an hirer jeeweileger Missioun op déi nämmelech Texter. Et ass haut allerdéngs nach esou, dass all Acteur säin Avis separat muss ofginn, respektiv seng Autorisatioun ausstellt.

Dem CGDIS ass et iwwer déi lescht knapp 6 Joer gelongen, sech duerch seng praktesch Erfarungen a Kompetenzen an der Brandbekämpfung als den Haaptacteur am Beräich vum präventive Brandschutz ze etabléieren.

Am Kader vum Erstelle vu sengem Avis analyséiert de CGDIS den Dossier souwuel wat d'Sécherheetsufuerderung fir d'Notzer vum Gebai, wéi och fir d'Pompjeeë selwer, ugeet. Eng séier a sécher Evakuatioun vun de Benotzer ass domat garantéiert, grad wéi och en effektiven Asaz vun de Pompjeeën.

Des Weideren gëtt et säit der Mise en vigueur vum modifizéierte Gesetz vum 10. Juni 1999 betreffend "Établissements classés" Aarbechtsgruppen tëschent der ITM an dem CGDIS, déi bei der Elaboratioun vun neie gemeinsame Virschrëften – respektiv bei den Upassungen vu bestoende gemeinsame Virschrëften – d'Evolutioun vun der Technik betruuechten (z.B. am Holzbau, bei Parkingen, bei Photovoltaik-Installatiounen etc.).

Dobäi kënnt, datt iwwert den Artikel 104 vum modifizéierte Gesetz vum 27. Mäerz 2018 betreffend d'Organisatioun vun der Sécurité civile d'Commission consultative de prévention d'incendie (CCPI) instauréiert gouf.

Dës Commissioun ass, duerch Représentante vun de betreffenen Ministère respektiv Verwaltungen (ë.a. CGDIS, SNSFP an ITM) esouwéi Utilisateuren (OAI, Bâtiments publics, etc.) besat. Si kann Avisen iwwert all méiglech Froen betreffend d'Applicatioun vu Konzepter an der Prévention incendie, neien Reegelen respektiv Modifikatioune vun bestoende Reegelen souwéi Evolutiounen vun architekturellen a konstruktiven Techniken ginn.

Een anert Beispill sinn d'Maison-relaisen an der Schoul, do gëtt et säit dem 15. Juli 2016 eng Circulaire vun enger harmoniséierter Prozedur, déi detailléiert d'Zesummenaarbecht vun den Autoritéite mat de Bauhären an deem Beräich beschreift.

D'Zesummenaarbecht fënnt also esouwuel am Virfeld vun de Projete statt, wéi awer och während der Projetsphas.

Bei Projeten, déi ënnert d'Kommodosgesetz falen, gi regelmässeg Réuniounen organiséiert, wou déi verschidden Autoritéiten mam Bauhär respektiv Architekt zesummekommen. A ville Fäll, a besonnesch bei Projeten, déi ënnert d'Kommodosgesetz falen, mee net nëmmen, mussen d'Projete mat der Zilgebung vum jeeweilege Gesetz individuell gekuckt ginn.

Fro 2

Am Kader vum Aarbechtsgrupp fir déi administrativ Vereinfachung, dee vun der Regierung no der „Réunion nationale Logement“ aberuff gouf, gi momentan Iwwerleeunge gefouert, wéi d'Prozeduren, déi de Bausecteur betreffen, vereinfacht a verbessert kënne ginn. D'Zesummeleeë vun dese Ressourcen an Prozeduren tëscht den verschiddenen zoustännegen Acteure am Bau erméiglecht et, d'Prozeduren ze vereinfachen an d'Bauen esou ze beschleunegen. Och am Beräich vun der Sécherheet gi sech Gedanken iwwer Vereinfachunge gemaach, déi souwuel prozeduraler wéi och inhaltlecher Natur sinn.

Dëst betrëfft dann och d'Erstelle vun Avisen an Autorisatiounen, wou folgend Measure analyséiert ginn:

1. eng besser Harmonisatioun vun den ëffentleche Consultatiounsprozeduren;
2. eng eenzeg Ulafstell fir de Bausecteur, fir Projeten anzereeche;
3. eng Vereinfachung vun der Reglementatioun am Zesammenhang mat der Konstruktioon an dem präventive Brandschutz mat enger méiglecher Kodifikatioun an enger objektiver Approche.

Ervirzehiewen ass, dass de CGDIS deen eenzeg Acteur am Domaine vun der Sécherheet ass, deen iwwer Wëssen, Erfahrung a Kompetenz an de Beräicher Brandbekämpfung a Brandschutz verfüügt a fir quasi sämtlech Bauprojekte ka consultéiert ginn, onofhängeg vun der Gréisst oder der Notzung (aktuell Ausnamen: Eefamilljenhaiser a Bi-familiales).

Duerch seng Missiounen ass de CGDIS och den zoustännegen Acteur, deen d'Objektiver vun der Präventioun definéiert. Et geet heibäi ëm:

- d'Verhënnere vun der Brandentsteeung ;
- d'Verhënnere vun der Brandausbreedung ;
- déi sécher an effikass Evakuatioun vu Mënsch an Déier; d'Erméigleche vun enger effektiver Brandbekämpfung.

Fro 3

Et ass virgesinn, dass den uewe genannten Aarbechtsgrupp demnächst dem Regierungsrat seng Conclusiounen wäert presentéieren.

Lëtzebuerg, den 3 Juni 2024.
Den Inneminister
(s.) Léon Gloden